

dapat menjauhkan daripada maslahat parti yang mereka menjadi wakil di dalamnya.

Dengan inilah sahaja diharap kelak maslahat-maslahat puak-puak kecil akan disuarakan oleh orang-orang yang dilantik itu yang tentunya tidak dipengaruhi oleh satu-satu maslahat-maslahat badan siyah sama ada yang memerintah ataupun yang tidak memerintah.

* * *

Jangan dibuang sebelum ada gantinya

Daripada apa yang disampaikan kepada pengetahuan kita bahawa usaha-usaha yang baik ada dijalankan dan diusahakan oleh pensyarah-pensyarah agama dari Kolej Islam ke kampung-kampung untuk menyedarkan umat Islam akan tanggungjawab mereka kepada agamanya dan akan kewajipan-kewajipan mereka kepada tugas mereka beragama dan tugas-tugas persatuan mereka di dalam persatuan Islam. Langkah yang demikian ini patut dan sangat disyukuri serta mustahak digalakkan. Mustahak juga pensyarah-pensyarah itu menjalankan kebijaksanaan di dalam menyampaikan syarahan-syarahan kerana telah umum kepada kita sekarang syarahan-syarahan itu tidak lagi digemari kalau kita kalau kita mengatakan ini salah, itu salah, ini dosa dan itu pahala. Tetapi yang utamanya pada masa sekarang ialah tiap-tiap pensyarah itu memberi kesedaran dan menjauhkan sama sekali umpat keji terhadap suatu golongan atau suatu puak yang lain.

Kita yakin kalau pensyarah-pensyarah itu menggunakan kebijaksanaan dan melihat keadaan-keadaan setempat, tabiat dan pergaulan di tempat-tempat itu dengan teliti maka ubatnya memberi pertunjuk - bukan memberi cemeti kepada kesalahan-kesalahan sesuatu atau keteledoran¹ sebahagian orang di dalam tugasnya melaksanakan agamanya. Sindiran yang halus atau penjelasan-penjelasan yang tidak langsung adalah lebih memberi kesan

daripada membuat syarahan-syarahan yang pedas ke atas mereka itu. Inilah yang sebaik-baiknya menurut pendapat kita diperhatikan oleh pensyarah-pensyarah agama yang menghadapi masyarakat kita pada masa sekarang.

Baru-baru ini telah disampaikan kepada kita bahawa ada sekumpulan pensyarah telah mencabar-cabar bahasa yang digunakan di dalam kitab-kitab seperti Kitab *Sabīl al-Muhtadīn*, Kitab *Maṭla‘ al-Badrain*, *Siyar al-Sālikīn* dan lain-lain kitab lama yang menggunakan bahasa Melayu yang kearaban dan bahasa Melayu tua yang sulit difaham oleh orang yang mendalam bahasa Melayunya dan kurang kaedahnya. Mereka menyatakan kitab-kitab seperti ini tidak sesuai digunakan di dalam zaman sekarang dan menghendaki kitab-kitab ini diketepikan sahaja dan tidak padan lagi dipakai pada masa sekarang.

Kitab-kitab yang tersebut ini sememangnya dari dahulu hingga sekarang masih dipakai dan digunakan oleh penuntut-penuntut Islam di kampung-kampung dan di pondok-pondok untuk mempelajari agama Islam, sekalipun bersusah payah. Kita mengetahui benar bahawa bahasanya sukar hendak memahamkannya dan kerana itulah kitab itu dikehendaki berguru dan dikehendaki penjelasan-penjelasan oleh guru yang memang telah mempelajarinya. Kita tidak menafikan kaedah tua, baik dalam cara bahasanya, cara susunnya dan cara menyampaikan fikirannya di dalam kitab-kitab itu tetapi tidak dapat dinafikan, kalaularah tidak dengan adanya kitab-kitab itu tentulah orang-orang yang dahulu-dahulu itu hingga membawa kepada sekarang tidak dapat mempelajari agama kerana kalau berharap kepada kitab-kitab yang terang dan jelas baru belajar dan baru mempelajari maka mungkin mereka tidak akan dapat mempelajari hukum agama kerana kitab-kitab agama yang bahasanya senang dan mudah difaham, susunannya teratur, syarah-syarahnya jelas kita yakin tidak ada langsung di dalam masyarakat kita orang Melayu di Tanah Melayu hari ini.

¹ Bermaksud kecuaian, kelalaian. Rujukan: Dewan Bahasa dan Pustaka.